

Forico Sechi  
 NARAIAT NONNU  
 2° premio ex aequo (Logudorese)

...E partemus  
 lassende custa terra  
 chi pariat serrada a su carignu  
 de zappos e suore,  
 che i su sinu de vergine 'elosa  
 a carignos d'amante.  
 Andemus  
 tanta ricchessa sonniende addae;  
 e cantemus,  
 subra sos pontes de sos bastimentos,  
 sas poveras cantones de Sardigna,  
 a su bomborobò,  
 ballende  
 sas dansas nostras, su passu torradu.  
 «ALLEGRU COMPA'»  
 «TOTTUS RICCOS COMPA'»  
 «TOTTU RICCOS, PERDEU...»  
 «TOTTU RICCOS, COMPA'».

Poi inie  
 unu mundu nou:  
 immensidade 'e zente,  
 palattos altos cantu affiet oju,  
 zittades chena fine,  
 macchinas, movimentu,  
 anda e torra, anda e torra...  
 e trabagliu:  
 cantu trabagliu!  
 «Custa si est terra noa  
 e aberit su sinu

a sos carignos che giovana amante  
 e non che i sa nostra, antiga, isfruttada  
 terra de tilighertas e mudeju.  
 «TOTTU RICCOS PERDEU, TOTTU RICCOS»  
 E trabagliemus. E cantu suore!  
 Suore chi in sa terra nostra ingrata  
 forsis haiat fioridu rosas  
 o fattu haiat solver sos granitos!  
 «TOTTU RICCOS PERDEU, TOTTU RICCOS»!  
 Da poi, lenu, quasi una frebba:  
 che i sa febba chi dae minores  
 gighiamus in ossos,  
 accò s'ammentu sou,  
 accò s'incantu sou,  
 de custa terra  
 chi paret d'esser coberta 'e majia.

Accò su mare sou biaittu  
 e i su chelu sou sempre giaru,  
 sos montes suos, sa campeda sua  
 e i sos buscos ue paret siat  
 firma sa manu 'e Deus.  
 Ite bellas sas tancas  
 e-i sos saltos suos  
 cando su sero su sole sind'andat  
 a si cuare in mare!  
 Sonos de piccarolos  
 e profumos de menta,  
 cantigos de puzzones,  
 ma subr'a tottu paghe  
 chi paret chi su coro  
 si fattat mannu mannu  
 cantu est mannu su sole chi s'avviat.  
 Oh, cant'est bella custa terra nostra!

E torremus...

«COMPA, CANTU GIGHIDES?»  
 «BARANTA FRANCOS, SU CHI M'HAPO ATTIDU»  
 «PASCIESCIA TORRAMUS A DOMO»  
 «A DOMO COMPA', A DOMO!»  
 «ALLEGRU COMPA'»

Ma non fit allegria.

Fit istruimentu

de ider torra sa terra, sa zente,  
 d'unu mundu diversu  
 dae tottu su mundu:  
 su mundu tottu nostru, sa Sardigna.

E torremus, torremus

ma inie,

in cussa terra noa

chi promittiat abbrazzos e oro,

inie amus lassadu

su menzus nostru;

tottu sas forzas de sa gioventura.

E fortuna, fortuna si torradu

nd'hamus nesi su coro

e i sos ossos.

Oh Sardigna bella

accogli nesi cussos,

nessi pro cussos, sos brazzos aberi.

#### DICEVA NONNO

E partimmo lasciando questa terra chiusa alle carezze delle vanghe e al sudore, come seno di vergine gelosa alle carezze dell'amante. Andammo, sognando tanta ricchezza, lontano e cantammo sui ponti delle navi le povere canzoni di Sardegna in coro, ballando le nostre danze: su passu torradu. «ALLEGRO COMPA'» «TUTTI RICCHI PERDIO» «TUTTI RICCHI COMPA'».

Poi, lì, un mondo nuovo, immensità di gente, palazzi alti quanto l'occhio spazia, città senza fine, macchine, movimento, va e vieni, va e vieni... e lavoro, quanto lavoro! «Questa si è terra nuova e apre il seno alle carezze come giovane amante e non come la nostra, antica, sfruttata, terra di lucertole e cisto». «TUTTI RICCHI, PERDIO, TUTTI RICCHI». E lavorammo, e quanto sudore! Sudore che nella nostra terra ingrata avrebbe fatto sbocciare rose o avrebbe fatto sciogliere i graniti. «TUTTI RICCHI, PERDIO, TUTTI RICCHI». Dopo, lento, quasi una febbre, come quella che avevamo da piccoli nelle ossa, ecco il suo ricordo, ecco l'incanto di questa terra che sembra velata di magia.

Ecco il suo mare azzurro e il cielo sempre chiaro, i suoi monti, i suoi campi, i boschi dove sembra ferma nel tempo, la mano di Dio. Che belle le tanche e le sue distese immense quando il sole va a nascondersi nel mare! Tintinnii di campanacci e profumi di mentastri, canti d'uccelli, ma soprattutto pace, solitudine e pace, che fanno grande il cuore quanto è grande il sole che tramonta. Oh! Quanto è bella questa nostra terra!

E tornammo... «COMPA' QUANTO AVETE?» «QUARANTA LIRE, QUANTO PORTAI» «PAZIENZA, TORNIAMO A CASA» «A CASA COMPA', A CASA» «ALLEGRO COMPA'». Ma non era allegria era struggimento di rivedere la terra, la gente di un mondo diverso da tutto il mondo: il mondo tutto nostro, la Sardegna. E tornammo, tornammo ma lì, in quella terra nuova che prometteva abbracci e oro, lì, abbiamo lasciato il meglio di noi: le forze della gioventù. Fortuna, fortuna se riportato abbiamo almeno il cuore e le ossa. Oh, Sardegna bella accogli almeno quelli, almeno per quelli apri le braccia.